

HITZ BITAN

EUSKARA NUP-EN

UPNren eta PSNren proiektuak aztertuko ditu Parlamentuak

E.E. | IRUÑEA

Nafarroako Parlamentuko Hezkuntza eta Kultura Batzordeak aztertuko eta bozkatzeko ditu, gaur, UPN eta PSN alderdiek Nafarroako Unibertsitate Publikoan (NUP) euskararen erabile-ra eta irakaskuntza arautzeko aurkeztutako lege proposamenak. 10:00etan hasiko da saioa.

Alderdi erregionalistak aurkeztu zuen lehendabizi bere proposamena, eta, ondoren, PSNk aurkeztutakoaren alde eman zuen boza, «antzekoak zirelako». CDNk eta EA-EAJk ere aurkeztu zituzten euren proposamenak, baina atzera bota zituzten.

Alderdi horiek, eta NUPeko hainbat ikasle eta irakasle taldek ere, gogor kritikatu dituzte gaur aztertu eta bozkatzeko dituzten UPN eta PSNren lege proposamen horiek.

Batetik, NUPeko CCOO, ELA eta LAB sindikatuak eta zenbait ikasle taldek berriki salatu dute

erregionalisten eta sozialisten asmoa dela euskara unibertsitateetik desagerraraztea, eta haren presentzia hautazko ikasgaietara mugatzea. Bestetik, bi lege proposamen horiek unibertsitatearen autonomia urratzen dutela salatu dute.

Oinarriak plataformak elkarretaratzea eginen du

Oinarriak elkarteak ere ez ditu begi onez ikusten UPN eta PSN alderdien asmoak, eta, haien lege proposamenen mamia salatzeke, elkarretaratzea eginen du gaur goizean, 10:00etan, Nafarroako Legebiltzarren aurrean.

«Gaiak euskararen etorkizunerako garrantzi handia» duela nabarmendu du Oinarriak-ek, eta, hori dela-eta, elkarretaratzean parte hartzeko deia egin die iruindarrei. Kontzentrazioa egin ez ezik, Nafarroako Parlamentuari egoera salatzeke agiri bat helarazteko asmoa du Oinarriak plataformak.

IRAKEN KONTRAKO GERRA. Bardean maniobrak egiten ari direla salatu dute



LANDER FERNANDEZ ARROIAE / ARGAZKI PRESS

Kontzentrazioa egin dute Iruñean gerraren kontra

Nafarroako Legebiltzarrean Iraken kontrako erasoari ezezkoa adierazteko proposamena eztabaibatu behar zuten, atzo, eta horren harira kontzentrazioa egin zuten 20 lagun inguruk Legebiltzarren egoitza parean —eztabaida atzeratu egin zuten datorren astelehena bitartean, Pagazauntunduaren hilketa zela-eta—. *Gerrarik ez. Gure izenean*

ez leloa zeraman pankartaren atzean egin zuten protestaldia. Bestetik, Aragoiko IUk salatu zuen, atzo, Bardean maniobrak egiten ari direla, Iraken kontrako gerra prestatzeko. IUren arabera, WTD-01-03 izenarekin ari dira maniobrak egiten, eta AEBetako 16 hegazkin eta bi helikoptero ari dira parte hartzen.

AHT

'Euskal Y'-aren zazpi zati idazteko lehiaketari buruzko azalpenak emango ditu etzi Alvaro Amannek

Jaurilaritzako Garraio eta Herri-lan sailburu Alvaro Amannek agerraldia egingo du etzi, Legebiltzarrean, GIFek (Espainiako Trenbide Azpiegituretarako Erakunde Kudeatzailea) larunbatean *Euskal Y* proiektuaren zazpi zati idazteko lana lehiaketara atera zuelako. Horren azalpenak emango ditu Amannek.

GERTAKARIAK

Arratia ibaian aurkitu dute iragan astean Igorren galdutako gizonaren gorpua

Ertzaintzak herenegun aurkitu zuen, Igorreko (Bizkaia) Arratia ibaian, iragan astean galdutako 84 urteko gizona gorpua. N.M.Z. iragan asteazken arratsaldean atera zen etxetik, paseatzera, baina ez zen gehiago itzuli. Ordutik Ertzaintza, Larrialdietako Zerbitzuak, Igorreko Udaleko zerbitzuak eta boluntarioak aritu ziren bilaketa lanetan. Igande goizeko 10:00ak inguruan herritar batzuek ikusi zuten gorpua uretan, eta Ertzaintzako urpekariek atera zuten bertatik.

Ertzaintzak Gorbeia mendian galdutako bi mendizale erreskatatu ditu

Ertzaintzak Gorbeia mendian (Bizkaia) galdutako bi mendizale erreskatatu zituen herenegun. Jaurilaritzako Herriazingo Sailetik jakitera eman dutenez, bi mendizaleek eman zuten abisua; Gorbeia igo zirela, jaisterakoan bidea galdu zutela eta non zeuden ez zekitelako esan zuten. Ertzaintzaren erreskate taldeek Arlobitik gorako bidea hartu eta Illunbeko gainetik gertu aurkitu zituzten bi mendizaleak, 22:00ak aldera. 30 urteko emakumea Txagorritxuko ospitalera eraman zuten.

AGERRALDIA

Nafarroako Fusilatuen eta Desagertuen Senideen Elkarteak hitza hartuko du gaur Nafarroako Parlamentuan

Nafarroako Parlamentuko Elkartasun eta Elkarbizitza Batzordearen aurrean agertuko dira gaur, arratsaldeko 16:30ean, Nafarroako Fusilatuen eta Desagertuen Senideen Elkarteak. Elkarte horrenkin batera agertuko da, batzorde beraren aurrean, Nafarroarekin Topaketa Fundazioa ere. Elkarteon asmoa da 1936ko gerraren ondorioz nafar askok pairatu zuten egoera gogorraren berri izan dezala Nafarroako Parlamentuak, egoera hori onar dezala eta nolabaiteko neurriak har ditzala nafar haiek eta haien ondorengoei pairatutako sufrimendua aitortzeko.

AZPIEGITURAK

Maltzagatik Soraluzerainoko GI-627 errepidea ordu pare batez itxiko dute bihar goizean

Eibarko Maltzagatik Soraluzerako GI-627 errepidea itxi egingo dute bihar goizeko 10etatik 12etara, Larreategiko zubibidea konpontzeko lanak ez direlako oraindik amaitu. Bidea itxita egon bitartean, Eibarrera doazen ibilgailu arinek Bergaratik Elgetara (GI-2632 errepidetik), eta Elgetatik Eibarrera (GI-2639 bidetik) jo beharko dute. Ibilgailu astunek, berriz, Arrasatetik Durangora doan GI-632 errepide berria hartu ahal izango dute, Kanpazar gainetik. Donostiarantz doazenean, azkenik, GI-632 (Bergaratik Zumarragara, Deskargatik), GI-631 (Zumarragatik Azkoitira) eta GI-2634 (Azkoititik Elgoibarrera, Azkarate gainetik) ibilbidea dute aukeran.

ATXILOKETAK

Ertzaintzak hiru lagun atxilotu zituen Bilbon igande goiza eta larunbat goiza bitartean

Igande goizean pertsona bat atxilotu zuten ertzainek Bilboko kaleetan, ustez auto bat lapurtzen ari zela eta. Atxiloketa egin ostean, inguru hartan zegoen beste auto batean lapurreta egin zuela ohartu ziren agenteak, soinean baitzeramatzan aipatu autotik hartutako zenbait gauza. Handik ordu batzuetara, berriz, beste lagun bat atxilotu zuen Ertzaintzak, etxebizitza batera leihotik sartu zelako. Azkenik, atzo goizaldean hamasei urteko gazte bat atxilotu zuten, lokal bateko sarraila behartu eta lapurreta egitekotan zelakoan.



Hondarribiko Udala

IRAGARKIA

32.2 Jarduketa Unitatearen birpartzelazio proiektuaren hasierako onespina.

Gobernu Batzordeak 2002ko abenduaren 23an egindako bileran, "32.2" Jarduketa Unitaterako Plaza Berri SLk eragin duen Borondatezko eta Jabe Bakarreko Birpartzelatze proiektuari hasierako onespina eman zion Alkate jaunak.

Jarduketa Unitate horren esparrua, Denda, Harategi eta Juan de Laborda kaleen arteko etxe-koadroaren zatia da, eta hegoaldeko muga egiten du Etxenagusia kaleko 4 eta 6 zenbakiak dituen etxearekin.

Erabaki hau jendaurrean jarriko da hamabost (15) lanegunez, iragarki hau Gipuzkoako Aldizkari Ofizialean, iragarki Oholean eta "El Diario Vasco" eta "Euskaldunon Egunkarian" argitaratzen den azken egunetik hasita, Udaletxe honetako Hirigintza Bulegoan aztertu eta bidezkoztat ematen diren alegazioak egin ahal izateko.

Hondarribia, 2003ko urtarrilaren 28a
ALKATEA
-Borja Jauregi Fuertes-



Lezoko Unibertsitateko Udala

IRAGARKIA

Alkatetza honek 2003ko otsailaren 4ko 42. Dekretuaren bidez erabaki du 107 poligonoko zehaztapenak garatzen dituen Plan Partzialari haserako onarpina ematea.

Dokumentu hori jendearen ezagutzarako ipini da. Udala honetako Hirigintza Bulegoan, hamabost lanegunez, Gipuzkoako Aldizkari Ofizialean iragarkia argitaratu eta hurrengo egunetik hasita kontatutik, 8:00etatik 13:30 orduetara, astelehenetik ostiralera, egoki irudituz gero edonork begira ahal izan dezan eta, behar balitz, alegazioak aurkeztu daitezkeen informazio Bulegoan epe eta ordu horien barruan.

Lezo, 2003-02-05.
Aitor Sarasola, alkatea.



Mutrikuko Udala

IRAGARKIA

Mutrikuko udaleko gobernu batzordeak, 2003ko urtarrilaren 15ean egindako bilkura arruntan behin betiko onarpina eman zion MUTRIKUKO ARAU SUBSIDIARIOETAKO A5-GAZTANETA EXEKUZIO UNITATEKO URBANIZAZIO PROIEKTUARI.

Akordio honek bide administratiboari eman dio amaiera. Nahi izanez gero, bere aurka hilabeteko epean —iragarki hau Gipuzkoako Aldizkari Ofizialean argitaratuz geroztik— berraztertze errekurtsoa aurkeztu daiteke akordioa eman duen organuaren aurrean. Eta bi hilabeteko epean —iragarki hau Gipuzkoako Aldizkari Ofizialean argitaratuz geroztik— errekurtso kontentzioso-administratiboa ere aurkeztu daiteke, Donostian dagoen Gipuzkoako auzi-epaitegian.

Mutrikun, 2003ko urtarrilaren 21ean
Alkatea. Joxe Agustin Elezgarai Flores.

Mutrikun, 2003ko urtarrilaren 17an
Alkatea. Joxe Agustin Elezgarai Flores.